

釋氏十
三經註
疏

圓覺經近釋

卷一
之三

冊一

大方廣圓覺脩多羅了義經近釋卷一

明二楞庵釋通潤述

體無不徧曰大。法無不備曰方。用無不具曰廣。故清涼云。大以曠兼無際。方以正法自持。用則稱體而周。具此三義。故名圓覺。脩多羅。此云契經。謂契理契機。故契經中有了義。不了義。如來爲人天二乘說不了義教。以器小不能擔荷大法。故說唯佛一人獨得覺性。爲菩薩乘說了義教。以根大能擔荷大法。故說一切眾生皆得作佛。然對機說教。雖各不同。而契理契機實無有二。此經直顯一切眾

生本來成佛。名爲圓覺。直截分明。毫無隱覆。此則契經中了義契經。非不了義契經也。然圓覺二字。義匪一途。故下文約十二義以發明。而義始備。如文殊章云。有大陀羅尼。名曰圓覺。又云。彼知覺者。猶如虛空。此則直指眾生心體。如如不動。了了常知者。爲圓覺也。普賢章云。一切眾生種種幻化。皆生如來圓覺妙心。此指根身器界及界內界外二種無明。併種種幻智。皆從圓覺妙心流出。此約出生凡聖染淨二法。名圓覺也。普眼章中。顯四大六根六塵六識。乃至十力四無所畏。悉皆清淨徧滿。

不動。始知眾生本來成佛者。此約凡聖染淨。悉皆具足。如來平等圓滿覺性。根根塵塵。周徧法界。名圓覺也。金剛藏章。一切如來妙圓覺性。本無菩提。及與涅槃。亦無成佛。及不成佛。無妄輪迴。及非輪迴者。此約染淨。聖凡纖塵不立。名圓覺也。彌勒章中。由本貪欲。發揮無明。顯出五性差別。不等依二種障而現深淺者。此約眾生皆證圓覺。本無差別。由隨染緣而有二障。故有六凡。由隨淨緣而證二空。故有四聖。於無差別處而現差別。以顯不變隨緣。如摩尼之現五色爲圓覺也。清淨慧章。若遇善

友教令開悟淨圓覺性。發明起滅。卽知此生性自勞慮。勞慮永斷。得法界淨。此名凡夫隨順覺性等者。此約五性差別不等。實無差別。以顯隨緣不變名圓覺也。威德章若諸菩薩悟淨圓覺。以淨覺心取靜爲行。名奢摩他。起變化行。名三摩提。隨順寂滅。名爲禪那。乃至辯音章中。單複圓修等者。此約一心三觀。卽空卽假卽中名圓覺也。淨諸業障章直顯眾生覺性本淨。皆由耽著我人眾生壽者四相。生愛生憎。爲障爲礙。不能入清淨覺。必須斷盡四相。一切寂滅。覺性始圓。名圓覺也。普覺章所問。

求何等人。依何等法。行何等行。除去何病。云何發心者。要須事事明了。毫無錯謬。名圓覺也。圓覺章以大圓覺爲我伽藍。身心安居平等性智者。謂具如上種種深義。方得渾身安住圓覺伽藍。故名圓覺。賢善首章。具上眾義。證此五名。方稱無上法王。爲賢善首。故名圓覺。故知十二菩薩綸貫一經。圓覺二字。通該眾義。豈可以一知一見。便謂盡圓覺哉。故題中旣標圓覺。又稱了義。正顯性相雙陳。理惑並闡。圓融行布。兩不相妨。始是如來稱性至極之深談耳。

唐罽賓沙門佛陀多羅譯

開元釋教目錄云。佛陀多羅。唐言覺救。北印土罽賓國人也。於東都白馬寺譯。道詮法師疏云。三藏法師佛陀多羅。於長壽二年龍集癸巳。持梵本至神都。於白馬寺譯。譯者翻梵語而成華言也。其度語筆授證義潤文諸德具如別錄。

如是我聞。一時婆伽婆。入於神通大光明藏。三昧正受。一切如來光嚴住持。是諸眾生清淨覺地。身心寂滅。平等本際。圓滿十方。不二隨順。於不二境現諸淨土。與大菩薩摩訶薩十萬人俱。

智論云。婆伽婆有四義。婆伽云德。婆言有。合名有德。又婆伽云分別。婆名巧。巧分別諸法。總相別相。故。又婆伽云聲。婆云有。以名聲普聞故。又婆伽云破。婆云能以能破淫怒癡故。入者。謂性相俱泯。體同法界。入無入相故。神通大光明藏者。卽如來藏之異名。是凡聖均稟同賦之體也。破業識之牆垣。名曰神通。撒無明之封蔕。名曰大光明藏。由不定而定。故曰正定。不受而受。故曰正受也。又大卽是體。光明是相。藏卽是用。又大卽法身。光明是般若。藏是解脫。問。大光明藏。人人滿足。若如來稱入。而

眾生豈出此光明藏乎。答。眾生未嘗出此大光明藏。但爲四大所局。二障所纏。而神不通。光明不大。故不言入。非不入也。故下經云。非覺違拒。諸能入者。有諸能入。非覺入故。宗鏡問云。博地凡夫。位齊諸佛。云何不具諸佛神通。答。非是不具。但是眾生不知。如有學人問。大安禪師云。如何是諸佛神通。師曰。汝從何來。答曰。江西來。師曰。莫不謾語否。答曰。終不謬言。學人再問。如何是諸佛神通。師曰。果然。斯皆可驗。並是現前日用。不知故。龐居士云。心通法亦通。十八斷行蹤。但自心無礙。何愁神不通。

故知神之不通是自生障礙耳。一切如來皆以此大光明藏莊嚴此身住持此土。非若眾生以藏識莊嚴此身住持此土也。然此大光明藏元非他物。卽是眾生所具無垢無染清淨覺地。諸佛證之名法性身。以不見有身心二相故寂滅無高無下。故平等無崖無岸。故曰本際不違不逆。故曰隨順無彼無此。故曰不二。由如來證眾生之體用。眾生之用。故能於清淨覺地現清淨土。與大菩薩同住一處。所謂以大圓覺爲我伽藍。身心安居平等性智也。問法身無相。真土如空。皆是一心。無別依正云。

何卽談身土。答只於自心性相分身土名。謂以自身相義名身。卽以自心性義名土。又心則諸佛證之爲法身。境則諸佛證之爲淨土。則法身淨土皆爲所證。而智爲能證也。諸大乘經在淨土說者。如深密經。法集經。稱讚大乘經。密嚴經。心印經。與顯經。大毗盧經。入印法門經。虛空藏經。佛地經等。佛地經云。是薄伽梵住最勝光曜放大光明普照無邊世界。周圓無際等。論釋云。此土受用土。攝說此經佛是受用身。此淨土量無邊際故。若爾。此地上菩薩所應見聞。何故於此化土中結集流布。論自

答云。佛爲地上諸菩薩說。令傳法者結集流通。又云。說此經時。地前大眾見變化身居此穢土爲其說法。地上大眾見受用身居佛淨土爲其說法。所聞雖同。所見各別。而傳法者爲令眾生聞勝希願。證佛功德。故就勝者所見結集也。然土雖多種。不出於三。一法性。二受用。三變化。若開受用爲自他。卽成四土。統唯二種。謂淨及穢。或性及相。故肇公云。淨土穢土。蓋隨眾生心之所宜。淨者示之以寶玉。穢者示之以瓦礫。美惡自彼。於土無定。無定之土。乃名淨土。隨類普應。故曰諸也。

其名曰。文殊師利菩薩。普賢菩薩。普眼菩薩。金剛藏菩薩。彌勒菩薩。清淨慧菩薩。威德自在菩薩。辯音菩薩。淨諸業障菩薩。普覺菩薩。圓覺菩薩。賢善首菩薩等。而爲上首。與諸眷屬。皆入三昧。同住如來平等法會。

夫聖人立名。多依行德。故各有所表。梵語文殊師利。此云妙首。亦云妙德。表根本智。六波羅密中。智爲首德故。此章直示因地法行。用根本智。頓斷無明。以顯清淨覺地。如如不動。故爲問首。普賢表行。由行以成德。故次普賢。知行並進。方便大開。則法

眼洞照。故次普眼。法眼旣明。惑根已斷。而金剛不
壞之體。迥然獨露。故次金剛藏。圓頓之根已解。唯
心若權。教菩薩不知惑斷。則顛預佛性。必須詳明
唯識廣辯階差。故次彌勒。惑相雖明。階差已辨。若
不知所證各別。則儻侗真如。故次清淨慧。惑相已
明。真如已解。若不知觀法。猶未能斷惑證真。不能
隨順得入。其於威德未得自在。故次威德。雖三觀
詳明。威德已具。若不詳辯三觀法輪。法輪無盡。亦
未得圓通無礙。故次辯音。觀法雖明。若四相不除。
業根不淨。不能入清淨覺。故次淨業障。四相已知。

業根已淨。若五行不明。覺心不普。猶隔一塵。故次普覺。五行既明。則中根可入。若不詳明道場儀式。建立三期。剋心三觀。則下根人猶在門外。而覺性不圓。故次圓覺。覺既圓滿。必立名以彰其實。故次賢善首。是知一經之義。自始至終。雖條分縷析。若統會一宗。則以大圓覺爲我伽藍。一言已蔽。故十二菩薩爲諸菩薩之綱領。而爲上首。其所入三昧。卽大光明藏。所住法會。卽不二境。所現淨土。以凡聖一源。主伴同會。故曰同住如來平等法會也。不思議佛境界經云。爾時世尊語文殊言。汝能了知。

如來所住平等法否。文殊言。我已了知。佛言。何者是如來所住平等法。文殊云。一切凡夫起貪瞋癡處。是如來所住平等法。佛言。云何一切凡夫起貪瞋癡處。是如來所住平等法。文殊言。一切凡夫於空無相無願法中起貪瞋癡。是故一切凡夫起貪瞋癡處。卽是如來所住平等法。佛言。空豈有法。而言於中有貪瞋癡。文殊言。空是有。貪瞋癡亦是有。佛言。空云何有。貪瞋癡亦云何有。文殊言。空以言說故有。貪瞋癡亦以言說故有。所謂平等法者。是指眾生清淨覺地也。近有解此經。大光明藏三昧。

之相狀何似。生滅心是顛倒心。是一切貪瞋癡煩惱皆是。堂堂釋子。乃甘心與魔外同流。而反極毀先賢譏訶老宿。噫。佛海漬穢。至此極矣。有志者讀此。寧不痛心疾首乎。

於是文殊師利菩薩在大眾中。卽從座起。頂禮佛足。右繞三匝。長跪叉手。而白佛言。大悲世尊。願爲此會諸來法眾。說於如來本起清淨因地法行。及說菩薩於大乘中發清淨心。遠離諸病。能使未來末世眾生求大乘者。不墮邪見。作是語已。五體投地。如是三請。終而復始。